

FJALA E DEPUTETES ALBANA VOKSHI

E HËNË 11 PRILL 2022

Zonja drejtuese e seancës,

Së pari, ju kujtoj që jeni në shkelje të Kushtetutës dhe të Rregullores. E them të Kushtetutës, keni kohë në fakt, sepse këtu shkruani që janë disa deputetë jashtë grupeve parlamentare, por ju nuk e keni këtë tagër të caktoni se kush është jashtë grupeve parlamentare.

Unë nuk jam jashtë grupeve parlamentare, por jam deputete e Partisë Demokratike. Jam votuar, këtë nuk e caktoni ju, por e cakton sovrani. Sovrani ka vendosur dhe ka votuar që unë të jem deputete e Partisë Demokratike. Keni kaq kohë që jeni në shkelje të Kushtetutës. Jeni të shkelje të Rregullores, sepse, e para, në nenin 46, pika 1, thuhet: “Duhet t’u vihet lista paraprakisht, të informohen deputetët për kohën dhe renditjen”. Kjo listë kurrë nuk na vihet në dispozicion. Shkojmë e kërkojmë, por lista ndërrohet 10 apo 20 herë dhe ne nuk marrim vesh se kush e ka radhën për të folur.

Sot paradite na u bë e qartë se ju kishit ndarë kohën tonë, pavarësisht se ishte 21,6 minuta, nuk na kishit dhënë as të drejtën për ta ndarë kohën mes nesh. Kam shkuar para se të fillonte seanca, para se Kryetarja e Kuvendit t’i lexonte emrat dhe kam kërkuar të tërhiqen deputetët nga fjala e tyre, nga minutazhi i tyre, pa e lexuar. Kam qenë në sekretari. Kemi tërhequr fjalën për t’i lënë zotit Berisha 12 minuta kohë, por sa herë që vjen radha për të folur zoti Berisha, ju sajoni 1001 marifete për të mos ia dhënë fjalën, sikurse nuk donit t’ia jepnit fjalën, pavarësisht se u dakordësua me zotin Ramadan Lika.

Do t’ju lutesha, zonja drejtuese e seancës, meqenëse ju jeni një juriste shumë e mirë, të na e bëni më të lehtë dhe mbarëvajtja e seancës plenare të jetë ajo që duhet dhe që përcakton Rregullorja. Nuk po kërkojmë shkelje të Rregullores, por po kërkojmë që ju të zbatoni çdo pikë dhe nen të Rregullores. Faleminderit!